



Jumat, 4 Agustus 2023

Ogen : Amos 3:9-4:3



Bagi Nurung I Bas Kawil



I bas sada wari, retreat me sada perpulungen Jabu-jabu (PJJ) ku Tongging Paropo. Kenca enggo dung kebaktin si ibabai Pandita, iterusken me ku bas acara permainen. Sada persada Mamre nadingken acara permainen e. Kurang akapna riahna perbahan singgur i je danak-danak ras Moria. Lawes ia ku ingan si deban, daramina batu inganna kundu, ipesikapna moran (kail) si ndube ikanting-kantingna. Buatna ka umpan ikan e tamakenna ku mata kawilna, e maka ambekkenna ku tengah dano e. alu saber itimaina ulihna. La ndekahsa mugur ugur kawilna ndai, anjar-anjar iangkatna, mata kawilna ndai enggo leket ku biber nurung, lanai banci pulah. Ku ja ban mamre ndai ku je ikut nurung ndai.

Bagi nurung i bas Kawil e, bagem kecibal diberu-diberu ras kalak si tading i Samaria. Lanai lit dalanna pulah janah la terpuluhisa nari bana erkiteken ukumen si ibereken Dibata. Ipediat Dibata pagi sada bangsa ngerintak kalak Samaria e, ku ja atena ibahanna ku je, la ngasup bangsa Samaria e ngelawan. Janah Dibata pe la nampati ia. Kegeluhenna lit i bas tan bangsa si deban. Lanai lit erga dirina, lanai lit si nampatisa. Isarenken kalak ia ku lubang si ndeher ku tembok kuta, je nari ibenterken ndarat. Em ulih adi nundalken Tuhan.

Situhuna, ndalanken kejahatan e labo lit untungna. Tuhu kentsik meriah niakap, minem-minem seh mabuk tempa ndatken ketenengen, mpebayak erta alu nindes kalak musil tempa teridah kinimbisan. Tapi, meripuk nge e kerina i lebe-lebe Dibata. Kuh kal dalam Dibata ngukum kita. PakeNa bangsa si deban ngerintak kita ras ndampesken kita ndarat i bas kuta ta nari, lanai lit erganta kai pe.

Jeralah! Ope lenga reh rawa Dibata

